

石湖詩集
范志道集
詩集注



志
道
集

顧
禧
著

中
華
書
局

IVT40/310}

叢書集成初編

石湖詩集（及其他二種）

中華書局出版發行

（北京王府井大街三十六號）

秦皇島市資料印刷廠印刷

一九八五年北京新一版

開本：七八七乘一〇九二毫米三十二分之一

統一書號：一七〇一八·一五一

志道集

此據粵雅堂叢書
本影印初編各叢
書僅有此本

志道集敘

從伯父景繁公少任俠既壯折節讀書於諸子百家方技卜蓍之書罔不披究爲文輒千萬言徹日夜無倦容聲名藉甚遠近於是里中同學者多忌公口舌攻搏難端叢起公獨以直道持乎其閒無所依倚惟與鄞縣林庇民保高安譚子欽惟寅交最善主兩先生家數年而忌者愈謀所以中之指作周世宗宮詞爲蘖禍幾不解會以遺逸薦得白歸乃具杯酒釋奠盡焚生平所著述凡百餘卷無復隻字存者病革之日惟枕書長嘯畧屬

後事數端而已嗚呼公讀書一生而潦倒困苦以布衣
歿而一時同學茂不通籍貴顯子孫豪富甲閭巷蒼蒼
報施又不知于詩書文字果何如也嗣弟宏聞不忍先
人手澤泯沒從江浙提刑轉運任公處抄得遺稿若干
首顏曰志道集蓋本魯論隱居行義之意我伯父洵當
之而無愧矣予少侍伯父稔知顛末因援筆述之後之
君子庶鑒而詳採焉至元壬辰春月泉州石井書院山
長福州路教授姪長卿子元氏拜書

方綱按此序出於景繁之從子子元至元壬辰是元

世祖二十九年距嘉泰初蓋九十年矣而其中言少
侍伯父則景繁之卒當在嘉泰之後此注蘇詩之錢
板蓋景繁猶及見之吳郡志謂景繁隱居五十年當
是自紹興之末至嘉泰初耳

志道集

宋古吳顧禧景繁著

採桑行

日高高蠶蠕蠕蠶能衣被天下不遑自保其軀

三俯三起作苦何辭

長安富貴家上錦下襦作苦不知

羅敷深閨女出入有常儀何爲乎度陌越阡執筐躊躇
執筐而躊躇夫婿雖貴豈能不蠶而衣

蠶者不得衣不蠶者得衣長安富貴家上錦下襦

男耕女蠶治有餘使君何不思使君策馬城南隅妾歸
深閣繅新絲

震澤行

襟吳控越莽無幅銀濤漂碣青山蹙水底隆隆晴亦雷
鯨鯢憑之鳩其族大者爲蛟小爲蛤吐光便欲凌日月
地緯夜拆霜鏡枯觸山飛沫天地白芳餌頻施巧不吞
雲輸霧委長兒孫撼岳吞舟逞大力日月已墜燭火尊
昨聞漁人謀其曹整罩施網瀾江臯藥程傾湖湖不流
涸智殫技將安逃蛟子蝦孫泣如雨沈虎涸鹿慘無語

吁嗟河伯靈何存鳴鼓聚市遂若此就中大魚最有神
夜入深宮控紫宸竭澤而來拂帝意浩蕩乾坤雨露新
千秋萬歲頌乃公鱣鯨無所施其雄延津灌莽飲大澤
魚安于下鳥翔空君不見然犀燒燕水族寒咫尺之水
多危瀾活女誨女恩無極枯魚何事泣河干

海棠秋

春風蕩漾花如織排擯深巖天地窄桃李芳菲鬪豔陽
嬌痕盡染胭脂色含丹欲吐嬌不勝獼髓遙分點瓊額
楊妃睡足口無語嫁作游絲怨風雨花神泣罷還欲訴

不願柔枝薦繁市願得常親君子傍秋深靜綰紫綃粧
孤桐獨立擎素月芙蓉零落無輝光瑤枝重整臨秋水
蓼蒲歷歷羞無香賞心況有雙鳬仙琴聲夜夜醉嬋娟
碧霞觴泛海棠醉曲欄麗影何踈蹊君不見南朝百里
花無數郁郁紛紛吐煙霧載歲無人禁採樵丹榦瓊姿
盡摧仆蘭蕙當門動見鋤草閒惟歎璇霓臥茲花勝植
瀛蕊苑一承顧盼猶未晚冉冉臨窗如有心嬾舞清歌
樂事遠蔓露凝霜色倍妍夔州何獨無詩篇茲花有詩
便不朽吁嗟托根良不偶

小春詞

玉霜斜舞桐枝溼析木熒熒石鯨泣芙蓉子夜卸穠粧
藥雨紛糝瓊飲急瓊樓玉宇微寒生氤氲暖氣出元英
白鹿觀中香粉散靈女祠前簫鼓鳴木奴千樹綻濃綠
太液粼粼黑鳥浴真臘燈光射紫薇漢宮齊唱鳳來曲
彩虹不逐天駟流公子初成狐腋裘尙衣日日頒紅錦
挾纊猶深邊士愁五鳳習習起蘭澤龍篆新盤大府厯
黍臞松醪次第陳野老欣然愛冬日煖爐高會樂未央
鴻雁南飛百草黃東君欲逗春消息獨遣桃花鬪橘陽

憩小峨嵋

偶上峨嵋嶺悠然對夕曛孤峯擎落日古殿宿寒雲石
暗松濤作天空鶴唳聞幽尋愜素抱世態自紛紜

不寐

英雄不世出豎子自成名誰諛美新筆曾憐覆楚兵輕
霜零病葉急雁過寒城入夜愁無似悲笳處處聲

宿徐稚山齋中

已將夙昔志抵掌爲君陳笳鼓悲吳地鬚眉憶漢臣梅
花憑夜發柳色隔年新此夕關河客應輸夜臥人

泊太湖寄內

草草出門去孤帆落暮烟笑談卿宛在辛苦夢難傳雨
礪蛟龍窟雲乘橘柚邊從來輕遠別此夕倍淒然

答譚子欽惟寅

束髮鄙章句清狂天下聞
菱菱招隱賦草草送窮文
捫虱輕王猛驅車揖范雲
皇家疎結網麟鳳自爲羣

偶作

彈鋏復爾爾登樓向落暉
煙深橫白鷺楓老宿彤雲
松牖寒威入琳宮遠磬聞
自然能遠俗無復賦離羣

雜感

不與漁樵狎甯知世事非功成枯戰骨髮端

字有誤儒誤

衣風雨槐陰夢倉黃斗柄微東鄰瓜正熟把酒裏清輝

偶作

日暮悲笳起孤衾入夢寒沙飛桐鵲隱草蔓石鯨殘龍
戰知何極烏栖轉未安幽燕多老將壯氣滿桑乾

野眺

遂愜耽幽興披襟坐水灣松枯濤不作鷗澹夢常閑漏
月寬樵徑吞星避釣環年來悲跼踖聊此破愁顏

一逕多幽色孤雲護短扉閒堦竹影瘦低岸稻花肥委
翠秋林晚傷弓宿鳥稀何時攜斗酒掬水弄清暉
緩步沿溪曲幽尋愜賞心散烟依瘦竹開網活枯鱗短
袖仍牽樹秋聲半擣砧農談喧隔岸不畏世機深
亂世功名易幽人愧素餐草深迷乳兔弓燥泣飛鸞燐
火排窗入溪聲帶雨寒行吟殊足樂回首羨彈冠

林庇民保留宿夜話

蹤跡忘疎密情懷歷晦明攜琴時一至倒屣輒相迎枕
發中郎祕尊餘北海醒浣花多勝侶風雨話深更